

金石學錄補

金石學錄補卷三

存齋雜纂之五

歸安陸心源剛甫編

明

陳登字思孝長樂人舉才學爲浮梁丞永樂甲申詔吏部舉能書者儲翰林思孝工篆籀最先至時吳下滕用亨待詔翰林工篆隸自視天下無愈已者且恃春秋高輕後進思孝就用亨言之戾許叔重者十數事相辨難用亨乃始默然不敢自矜思孝于六書本原精攷詳究周秦以來二千年間其石刻有在而委棄山顛水崖者皆深求而必得之雖殘缺剝落歲月

名氏無可考審度其某代某人率中七八其收蓄之  
富歐陽文忠趙明誠之後所僅見也其于金石廣求  
厚積遇有重複往往以惠友朋編有碑目二卷其論  
釋山碑翻本云長安第一紹興第二浦江第三應天  
府第四青社第五蜀中第六鄒縣第七

東里文集陳  
思孝墓誌參

各  
跋

楊士奇初名寓以字行泰和人建文初以名儒薦累  
官少師華蓋殿大學士諡文貞嘗取所得周秦以來  
篆隸行草之書百二十通粹爲一卷名曰法書志著  
東里文集三十卷續集九十六卷碑跋甚多可資考

證其跋石鼓文曰石鼓文十元國子司業潘迪考訂音訓刊附于後在今北京國子監此刻鄭夾漈定爲秦篆歐陽公集古錄疑自宣王共和至宋嘉祐千九百年且文細刻淺理不應得存又疑其自漢以來博古好奇之士皆畧而不道余謂石鼓文決非秦漢以下之人所能所謂文細刻淺者安知當時不深刻厯世久遠則磨滅如此而今文字之存者計裁三之一耳其中不可辨識者又三之一則亦久遠之驗也且三代鐘鼎尙彝之屬前未嘗見稱於世而後來田夫牧子往往出于荒野埋沒之中者代有之矣何獨

致疑于石鼓哉其跋華山廟碑曰右漢碑之佳者蓋郭香書漢魏以前碑多不載書刻人氏名此獨詳焉遂因之有聞於今自古賢德君子泯沒無聞於後者何限而有聞無聞亦何足計哉若李德裕位至宰相猶區區附名其顛欲託不朽歐陽公所以譏其近愚也其跋夏承碑曰右漢淳于長夏承碑無書人氏名中書舍人陳登思孝定爲蔡伯喈書字畫特奇古蓋用篆筆也歐陽公集古錄無之趙明誠金石錄云元祐中洛州因治河得此碑于土壤中刻畫完好如新是宜歐公之未得也而近歲廣平府民又因治河得

此碑廣平古洛地蓋不知元祐之後又何時而埋沒也今視漢他碑尙完好物以晦而全固理之常也其跋孔子廟學記曰右孔子廟學記古隸書碑盛行於今者尊廟受禪及孔子廟學記三碑皆魏人書而尊號受禪世謂出鍾繇梁鵠竟未有適說惟廟學宋人以爲鵠書亦非碑所載蓋漢魏以前士人多能書不爲異也故鮮有著其氏名者後世能書者鮮故必著氏名以自表然凡一代之書必相彷彿論古書之體者考其時代可矣何必拘拘出某人哉其跋吳段石岡紀功德碣曰右吳孫皓天璽元年段石岡紀功德

金匱石經卷之三  
碣八分書相傳出皇象極高古而其文缺壞不可見者已三之一蓋宋元祐中此碣已斷爲三在天禧寺門外時轉運副使胡宗師徙置漕臺今在應天府學又不知何時所徙也考吳志天冊元年吳郡言掘地得銀上有年月字遂改明年爲天璽元年是年鄱陽言厯陽山石文理成二十字云楚九州渚吳九州都揚州土作天子四世治太平始又吳興陽羨山有石室之端又改明年元爲天紀以協石文此碑不見於志考其文有天發神讖等語則亦當時瑞應之事然天紀四年王濬遂入吳矣其跋智永千文曰右石在

西安府學蓋宋大觀三年所刻永嘗書八百本歐陽  
文忠公集古金石刻文所得永千文疑其筆法不類  
者二百六十餘字意是後人所補遂去之此刻出於  
公沒後數十年使其見之當不寘疑也千文所始蓋  
梁武帝令殷鐵石於羲之書中搨一千字不重者命  
周興嗣次爲韻語以教諸王前志所載如此歐陽公  
因見法帖有漢章帝書海鹹河淡百餘字遂謂前世  
已有不始於羲之劉後村之說亦然余謂此百餘字  
亦出梁以來好事者所集不然自漢至梁其間能書  
多矣何以都不聞有一人見之於書而獨章帝哉其



跋化度寺碑曰區易醴泉皇甫化度其結體各異或莊或逸獨化度最爲得中然亦惜其石刻於今最爲鈔壞也石刻西安府學又跋曰歐陽率更化度帖最宜學書者師法惜今漫滅不可識者幾半矣鄒汝舟庶子見惠此本蓋後來杭州明慶寺所翻刻者紙墨頗佳余去其所不可識而採其可識者表之以爲學書者之便其跋漢桂陽太守周府君功勳碑曰右碑漢熹平二年建唐太和三年重刻字雖剝蝕其可辨識處渾然漢意固在也今在韶州府治先師海桑陳先生志其本末甚詳其跋漢廬江太守范石碑曰此

碑未有碑額其前後及下皆缺姓氏名字紀年皆不見碑云爲侍御史冀州刺史亦皆不見於史傳或者史之畧也碑在濟寧州學斷裂多矣夾祿鄭漁仲定爲蔡邕書漢碑至雖斷裂訛缺其僅有者無不佳如此碑尤爲難得矣其跋漢郎中鄭固碑曰此碑今在濟寧學中前後無年月其中云延熹元年拜某官文云年四十二則知爲桓靈時所建也但文字磨滅特甚歐陽公集古錄跋尾猶載其中數語今多漫滅不見也其跋漢司隸校尉忠惠魯君碑曰碑在今濟寧州學鄭夾祿定爲蔡邕書已斷爲二文字磨滅不可

讀者殆四之一其跋漢封龍山碑曰右碑在元氏縣  
漢延熹七年至今千二百餘年石刻雖頗剝蝕而文  
字尙可尋究碑首云封龍山者北岳之英也其跋晉  
平西將軍周府君碑曰右碑陸士衡文王逸少書刻  
石在今常州宜興縣府君諱處義興人義興今宜興  
也碑後題云唐元和六年義興縣令陳從諫重樹瑯  
琊承仕榮鐫蓋至唐再翻刻也其跋岳麓寺碑曰余  
晚喜北海書最後得此而凡前之所得者皆不及也  
近於中書舍人劉素家見北海秦望山法華寺碑溫  
潤清麗蓋又特出也法華故在紹興府寺及碑皆久

燬甚可惜也又跋曰岳麓寺碑石刻在長沙余前後  
所得十數本皆紙墨糊塗甚至不可辨識蓋打碑必  
得善工而湖湘善工猶難遇長沙同知李吉特爲余  
致此本故視前所得差勝也其跋雲麾將軍碑曰李  
北海雲麾將軍碑永樂丙申用之在北京以寄余者  
此碑出良鄉縣北海所書有兩雲麾將軍碑其一在  
陝西陝西者李思訓良鄉李秀也陝西者書法差勝  
然余畜北海書獨此及岳麓寺碑耳其紙墨又此碑  
差勝也其跋陶隱君茅山帖右華陽陶隱君茅山帖  
後有廬山曹士冕跋顏魯公大駕帖米南宮露筋碑

文字皆完皆行書之佳者又有南唐李後主行書望  
固園賦畧米南宮題十字在後疑皆士冕家所刻者  
余客武昌時得之湖廣參議吳文家其跋九成宮醴  
泉銘曰右石刻在西安府麟遊縣缺蝕多矣凡遇平  
生所得數十餘本此本得於給事中毘陵胡源潔紙  
墨特勝故獨存也其跋漢泰山都尉孔君碑此碑延  
熹七年其故吏門人所建視漢他碑稍完宙融之父  
也見漢書融傳其跋泰山李斯篆曰右泰山石刻李  
斯篆今可見者惟此四十六字字畫渾厚而結體差  
長余得之山東兗憲洪遵道嘗見應天府學有石刻

宋劉跂泰山秦篆譜跂自序其畧曰初宋莒公歐陽文忠公得泰山斯刻皆止於五十許字高不過四五尺形制似方非方四面廣狹不等所謂五十許字者在南面稍平故嘗爲人所撫搨其三面皆殘缺蔽閤跂始刮摩垢蝕而撫搨之凡篆字二百二十有二可讀者百四十有六其文起西面而北而東而南西面六行北三行東六行南七行行各十二字其末行制曰可三字復轉在西南稜上總二十二行跂河間人此譜政和中所爲然今人所得泰山斯刻惟止此四十餘字豈其餘今皆已磨滅歟抑復爲垢蝕所蔽而

士大夫未嘗親造其處撫搨之工又皆苟且塞責不肯盡力歟故余志跋所說以見大槩云又跋曰右秦二世東行詔書李斯篆其篆甚佳余在兩京廿餘年求之不能得比連得於洪遵道而楮墨亦佳京師四方之所趨也而好古博雅之士皆在其所收蓄周秦以來金石刻皆富然余獨見鄒仲熙高庭禮陳思孝有此刻固其難得如此也又跋曰余旣得泰山秦篆又求得劉跋此譜遂附於後以見秦刻在泰山者其未磨滅蓋不止於今之所傳墨本也應天府學有此譜石刻余得之張士謙云又跋曰考史記所載始皇

東遷頒視劉跋小字譜不同者十字史記臨位跋作  
臨立二十跋作廿遠方黎民跋作遠黎休昉跋作著  
明後世跋作後嗣躬聖跋作躬聽禮順跋作體順後  
嗣跋作昆嗣餘皆同鄭文寶及各處嶧山頌皆出徐  
鼎臣史記不載其書二世詔史記有之其跋寶晉齋  
帖曰無爲州舊有寶晉齋帖石刻余索之久未得蓋  
數遇州士子及官于彼者皆云無復存矣今年周恂  
如員外奉命督賦無爲因託往問周還以此見遺蓋  
石刻在州學今所存惟此廿帖耳皆右軍書又得米  
方尺隸書數字良快余意今書學雖廢然安有董治



金不里金石錄 卷之三  
教於斯游學於斯而了不知者世間寶物往往蔽於  
庸人俗子如此甚可嘆也其跋漢穀城長張君碑曰  
右額蓋中平二年其故吏所立文辭字畫皆古雅在  
今東平州學其跋虞恭公碑曰此碑最宜初學者師  
法然歲久碑石已缺其下三之一而字畫甚好今附  
於此其跋漢溧陽校官碑曰右碑建於靈帝光和四  
年蓋長平人潘乾爲溧陽長興學脩教其丞趙勳等  
爲建此碑今在溧水縣學字多漫滅不可辨識其跋  
白石神君碑曰右未有額蓋靈帝光和六年所建文  
多剝落尙可讀而字畫甚佳其跋北京座位帖曰北

京顏魯公座位帖本四幅永樂四年扈從之臣多得之止二幅蓋失其半久矣十一年民有治圃得之者楊學士亟以二紙見遺余并取舊所得於沈民望修撰者通表之遂爲完物譬如延平之劍神物終當復合也其跋孔子廟堂碑曰石刻在西安府學嘗在內府見舊刻本與此迥異蓋歲久碑刻剝蝕失其真也歐陽文忠公童子時得此碑刻畫完好後廿年復得之則已殘缺況今又得三四百年哉其跋右軍書曰此出曹氏星鳳樓帖中不完所存者皆右軍書行書十餘帖草書四帖州民奉橋臨墓田丙舍官奴虞治

書裴鮮皆在楷書有樂毅海字本又有全本有東方  
畫贊無蘭亭序而有宋人題跋數首其跋漢圉令趙  
君碑曰右碑初平元年立蓋獻帝嗣位初年也在今  
鄧州南陽縣學中文字磨滅不可見者將半矣其跋  
漢北海相景君碑曰碑今在濟寧州雖完而字畫漫  
滅不可讀者多也其跋魏受禪尊號二碑曰右二碑  
世或以爲梁鵠書或以爲鍾繇不可必而雄麗古雅  
後之攻隸者必取法焉二碑皆在許州尊號碑其下  
近趺處皆磨滅不明蓋古碑厯世久遠多如此也其  
跋洛神賦二帖曰右獻之書洛神賦十三行陳正倫

所贈石刻今在常州而刻手不及又曰洛神舊石刻之佳者今皆不存獨有此在毘陵而刻手甚劣僅存其意耳其跋智永千文曰右真蹟故藏鮮于伯幾家大德中摹刻在松江郡學永書如精金粹玉此刻於規模結構近之論丰采神韻相去甚遠其效龍伯高而未至者歟其跋唐中興頌曰此頌前三十年見有得者字畫多明白而十數年來有得者其模糊率類此豈其石近又剝蝕歟抑打碑者之不善或有善者而余未之見歟其跋蘭亭帖曰此帖石刻今在頴上縣其首題曰唐臨絹本而臨者刻者皆弱余得之廖

子謨又跋曰此福州本余所得多矣獨此有陳膚仲題膚仲三山人晦庵門人張商英兄亦名唐英卒於神宗之世此所稱唐英當別是一人又跋曰近年揚州僧舍發地得二石皆蘭亭舊刻一缺其前一缺其後鹽運使何士英裁齊合之爲一前所存者十八行止猶不二字後存者十行起能不二字兩本肥瘠相近清韻可愛論骨氣當在福州鄭本之次世傳宋思陵駐蹕於揚金人奄至車駕倉猝出避御用物皆不及將所愛蘭亭石刻瘞之而去此豈是耶柴叔興侍郎凡得兩本分一見惠因識其大畧又跋曰此刻今

藏中書舍人胡宜衡家視鄭本微不及視松雪差優  
又跋曰右帖得之王時彥詹事王忘所自得亦不究  
石刻存否當是唐人所臨豈褚河南之蹟乎此本又  
在鄭之下胡之上又跋曰內府所藏刻本有三十餘  
家今石刻存者甚少余所見者汝州本紹興本臨江  
戲魚臺本福州有鄭清之家舊刻本穎上唐臨絹本  
北京太學及蜀中有趙子昂臨本嘗多得之此五本  
近一時所得其高下不齊王時彥云蘭亭下者入目  
還自有趣殆不虛語又跋曰前翰林檢討王偁得蘭  
亭墨本以進文華殿蓋唐人鈎摹者詹旨命刻石間

賜大臣及近臣此卷左諭德臣士奇所被賜者謹拜  
手識而藏之

東里集

案東里集流傳甚罕王蘭泉司寇

輯金石粹編于前人碑跋搜採甚富東里跋僅收一  
二想亦未見其書耳洪永宣正之時泰山秦碑存四  
十六字雲麾將軍碑未破爲柱礎封龍山碑已有傳  
搗華山碑尙無闕佚圜令碑尙在鄧州夏承碑尙在  
廣平皆近來金石家所未聞也

劉智安永豐進士始拓封龍山碑以貽楊東里

東里集

梁潛字用之好古博雅見陳思孝所編碑目卽鈔一

本按目訪求

東里集

鄭真字千之鄆縣人研窮六籍旁及百氏洪武四年  
鄉試第一授臨淮教諭升廣信府教授以古文著名  
與宋濂埒箸榮陽外史集集中有顏魯公中興頌跋  
爭坐位跋家廟碑跋多寶塔碑跋柳公權元秘塔銘  
跋二重刻司馬溫公碑跋王彥超本廟堂碑跋五白  
石神君碑跋秦王告少林石刻跋皇苻君碑跋三化  
度寺碑跋四虞恭公碑跋博古堂黃庭經樂毅論跋  
昭仁寺碑跋四唐人斷碑跋雁塔本褚河南聖教序  
跋陝石驛山碑跋西平王李晟碑跋郭太保廟碑跋  
雲摩將軍李思訓碑跋武林明慶寺化度禪師碑跋



九成宮碑跋六沈傳師書羅池廟碑跋定陶本夫子  
廟堂碑跋懷仁聖教序跋李衛公上西岳書跋桂陽  
周府君碑跋汝帖跋裴行儉書太原郡王魯國夫人  
楊氏墓誌跋吉安本曹娥碑跋魏受禪碑跋上尊號  
碑跋大饗碑跋王枕蘭亭跋索靖月儀石刻跋智永  
真艸千文跋二夢英篆書偏傍跋華山碑跋歐陽率  
更蘭金詩跋袁正己書陰符經跋龐仁顯書護命經  
淨經跋其跋化度寺碑曰化度寺碑在今平涼府  
董縣丞者得諸蕭寺塔中留秘私室後移諸  
公客有自陝來言碑爲人竊載軍士爭奪之

鑿碎據此則化度碑之亡當在明初矣其跋昭仁寺碑以爲八法絕類虞世南決爲永興書其跋醴泉銘曰醴泉銘今在麟遊縣雖磨滅已久而渾厚勁直之氣殆如見其貌冠肅容爲宮僚時也又跋臧九疇所寄醴泉銘曰字畫雖日就磨滅視江南諸翻刻鋒鉞削露高下居然可見又跋寄兒子復昇本曰醴泉銘世所盛傳然重模疊刻失真已久據此則九成宮碑明初覆本甚多矣其跋定陶本廟堂碑云縣有是碑不詳所自始至正間黃河泛溢碑沒入水中縣尹王瑤叔璵洩出之視陝刻頗瘦較之錦江石刻則相伯

金石學錄補

卷之三

三

仲云則廟堂碑又有錦江定陶二刻矣又曰夔夔子  
山所進金圈兒本今在秘府不可得見據此則元時  
廟堂碑原拓有金圈兒本今不知猶在世間否其跋  
司馬溫公碑云舊碑高二十餘尺宋崇寧間蔡京當  
國黨籍禍興仆碑滅字埋之土中金時有令夏縣者  
至公墓所見龜趺覆以高樹羣蜂窠穴其上遂蹤迹  
得舊碑掘而出之購得蘇公真迹鋸石爲四段橫刻  
之作屋龕置壁間主僧打拓無虛日據此則今所存  
司馬溫公碑亦金時覆本非原刻矣此皆近時金石

家所未聞也

榮陽外史集參  
嘉靖宣統府志

楊璿字叔機無錫人酷嗜文史殘碑斷碣打搨幾遍  
明名臣碑版錄

洪遵道鄉仲熙高庭禮與楊東里同時皆好古博雅  
之士收金石刻甚富各藏泰山碑可見者四十六字  
東里集

吳寬字原博長洲人成化壬辰廷試第一官至禮部  
尙書謚文定著匏庵家藏集七十卷其跋泰山石刻  
曰蓋始皇東封有頌至是李斯等奏請刻之其文見  
史記曰丞相臣斯臣去疾御史大夫臣德昧死言臣  
請具刻詔書刻石因明白矣臣昧死請具刻詔書刻

石此作金石刻又夫上缺大字不同其餘滅丞相臣三字蓋石有四面此其一耳按集古錄本云得之江鄰幾謂鄰幾嘗自至泰山頂上見其石頑不可刻又謂旁無草木而野火不及故能久然風雨所剝其存者纔此數十字及觀金石錄云劉跂亦嘗親見碑四面有字乃摹得之文雖殘缺然首尾完具不可識者無幾而秦篆完本復傳世間則所得字不如趙之多而二說且不同矣吾友徐仲山以工部主事治泉齊魯間因登泰山摹此遺予蓋去歐趙時又數百年其所得止此亦其宜也又後數百年磨滅當益多斯之

真刻傳於世者當益少好古之士宜相與惜之其跋尉氏故吏處士人名曰按金石錄載尉氏令鄭君碑君字季宣聘君之孫年五十有七卒于中平二年餘皆斷裂不成文理亦不知其爲尉氏令特以碑陰人名知之其碑至今益殘缺視此尤甚故不模此刻近歲葉文莊公碑目亦不載集古錄且無而予獨得之蓋非仲山好古不能爲予致之也其跋廬江太守范府君碑額曰按漢書范式字巨卿山陽金鄉人以獨行聞于時所謂與張劭爲死友者式少游太學後舉州茂才四遷荊州刺史卒于廬江太守其碑相傳爲

蔡邕書金石錄載其立于魏青龍三年知其非出一  
手碑已殘缺故不模獨得其額甚完亦可愛也其跋  
度尙碑曰此漢荊州刺史度侯碑也在沛縣湖陵城  
牖下僚友董尙矩過其地見而爲予道之適顧崇善  
工部出理漕渠予因託之加愛護焉崇善欣然旣徙  
置徐州官廨他日乃搨此本見寄觀之則殘缺已甚  
獨其額完而首尾有君諱尙字博平與永康元年數  
字可識耳其餘隱隱皆不成文以其殘缺宋人遂磨  
而題識其間然亦難識矣若謂此碑初在北陵東郊  
缺裂仆地有欲徙之名不果旣而大水至衝入于河

或集善水者挽出之始徙于使星亭而撤其西壁蓋  
叙其徙置之難如此所謂使星亭不暇訪獨不知此  
碑何時復在牖下豈其地卽亭之遺址耶夫度侯事  
具載漢書不假此而傳獨惜古刻之存于世者少若  
此碑使更歲久將益爲風雨所壞其與頑然片石何  
異此尙矩崇善之力足爲好古之助而予所欲書者  
也其跋陳氏甲秀堂帖曰刻于廬山陳氏內有周石  
鼓文譜秦泰山詔譜并權銘量銘漢鄧騭討羗竹簡  
隋煬帝序曹子建帖晉王右軍荀侯帖唐歐陽率更  
顏魯公倣右軍帖魯公祭稿懷素帖李太白醉稿白



文公詩宋司馬文正公銘蘇東坡手簡黃山谷詩諸  
刻予少時藏此一日劉廷美僉憲過予家見之借去  
後劉公沒從其家索之不可得蓋其三子異居裂而  
分之矣弘治丙辰予居家三子始各持還仍合于一  
其刻舊亦不完而石亡且久予故尤惜之耳

鮑庵集

凌湛初烏程人迪知子也雅好古人圖籍碑版至脫

內子簪珥以購

弇州山人集

程子行好詞翰與古文佳石三代鼎彝之器有吳下

名士風

弇州山人集

李應禎名銓以字行更字貞伯官至太僕少卿長洲

人精識古書畫購搨名賢畫像及金石刻不厭繁劇

吳郡文粹續

陸深字子淵號儼山弘治乙丑進士官至詹事華亭

人著儼山集凡十九卷碑帖題跋甚多藏有商父乙

鼎圖而爲之跋

儼山集

李東陽字賓之茶陵人天順八年進士官至戶部尙

書謹身殿大學士諡文正工篆籀著懷麓堂集有碧

落碑跋

懷麓堂集

王直字行儉江西泰和人永樂二年進士正統中爲

吏部尙書贈太師諡文端著抑庵集有石鼓文跋足

與趙古則之說相發明

抑庵集

祝允明字希哲長洲人與陳暉同輯吳中金石新編

提要

徐勣字興公閩人著筆精八卷有攷證金石十四則

筆精

謝肇淛號在杭閩人撰滇略八卷載南寧縣南土餘

里有爨府君碑此爨碑見著錄之始也

滇略

沈洪字雄仲萬三之後善草隸藏薛尚功鐘鼎款識

真迹二十卷後歸史明古

寓意編

王世懋字麟洲太倉人與兄世貞皆以收藏金石書

畫著名江南所藏有唐本虞永興孔子廟堂碑宋本  
褚河南孟法師碑宋本泰山碑皆有跋載奉常集

考集

卞衮著有古器銘釋十卷

千頃堂書目

湛若水字元明廣東增城人弘治乙丑進士官至兵

部尙書著有嶽麓書院禹碑釋文一卷

同上

周宏祖編古今書刻四卷載各府州縣書刻並及石

刻

同上

焦竑字弱侯金陵人編欣賞齋碑目二卷

同上

張鳴鳳撰桂勝八卷于石刻題名之類搜採尤詳

提要

董斯張字遐周烏程人撰吳興備志三十二卷內金石徵一卷于兩漢以來金石記載無遺

顧從義字汝和上海人嘉靖庚戌詔選端行善書從義名第五授中書舍人隆慶初以修國史擢大理評事篤志摹古又精賞鑒家居購玉泓館所蓄鼎彝甌刀劍匱盤皆三代以前物好購古帖得卽摹勒上石著有閣帖釋文考異手摹宋本淳化帖縮摹宋搨石鼓文皆爲世所重

明文海

沈懋孝有石鼓記蔣德璟有石鼓小記均足以資考

證明文海

周思宸萬曆十五年重摹比干銅盤銘于墓上而題其後

吳炳字彥輝汴人漢淮源廟碑漫漶不可讀杜昭守

唐州乃延炳參用漢隸釋書舊文于石而刻之并州續稿

朱大韶字象元華亭人由莘莊遷郡城嘉靖二十六

年成進士選庶常授檢討冊封襄藩分校禮閣時倭

寇起東南大韶以親老乞改南雍遂得司業迎養官

舍未幾解仕歸築精舍構文園以友朋文酒爲事性

豪俠軒舉晨起登快閣手丹黃點勘異書數葉始就

櫛盥應賓客座右陳彝鼎壘洗暇則展法書名畫或

著述賦詩客至留連不勝杯酌而喜人飲徹夜無情

容騷人墨卿無不履次於戶者卒年六十一

松江府志

張應文字茂實號被褐先生蘇州人好學無所不通  
藏書萬周方鼎周公卣罇鐘編鐘諸器著清祕藏二

卷論金石頗詳

劉同升字晉卿江西吉水人著有金石寶鑑錄

程福生字梅巖江西玉山人著有金石遺文四卷

金石學錄補卷四

存齋雜纂之五

歸安陸心源剛甫編

國朝

李中馥陝西人著石鼓考

陝西通志

潘耒字稼堂吳江人顧亭林門人康熙二十二年薦舉鴻博授檢討著金石文字記補遺以補亭林所未備

彭元瑞字雲楣江西南昌人乾隆丁丑進士官至協辦大學士謚文勤著有恩餘堂三集知聖道齋讀書跋尾有校官碑跋碧落碑跋溪州銅柱記跋三北宋



石經跋銅柱記跋攷證頗精核

徐天柱字擎士德清人乾隆三十四年進士著冬心存十四卷其自序曰鄭氏金石略詮次無法歐趙二錄差爲詳備洪氏兼錄碑文尤爲善本惜至黃初而止耳乙巳之冬舊疴勿藥杜門卻埽取曩時所藏堆置案上鱗次櫛比每種輒識崖略於後大抵唐以前咸箸於錄宋元以來或因人而存或因書而存凡十四卷都爲一集視歐陽二公所錄未及半然頗有二公所未見者

湖州府志

查禮字恂叔嘉興人乾隆中由捐納主事官至湖南

巡撫得嘉祐石經周官殘本疏其原委訂其紕繆作  
嘉祐石經考二卷沈廷芳爲之序

隱拙齋集

金德瑛號檜門休寧人官至左都御史乾隆元年進  
士平生手批經史朱墨圈乙者幾千卷有以考訂相  
質者爲指摘諸書不失行幅奉

敕修西清古鑑其間鼎彝尊缶各銅器德瑛援據經  
史百家文集訂正爲多在山左購求漢唐以下碑版  
石刻考究精覈凡跋高簡識者謂不減金石集古兩

錄

忠雅堂集  
金公行狀

陳孝泳字虞言江蘇婁縣人博雅工篆隸長於鑒別

京師公卿交重之乾隆十年

詔修西清古鑑求能識古文奇字者參預討論吏部  
尙書汪由敦以孝泳名薦入

齋宮校閱昕暮趨直鉤攷審視不爽毫髮旋舉乾隆  
十七年順天鄉試西清古鑑成

內廷大臣奏留供奉

懋勤殿工部尙書裘曰修薦爲國子監學正三遷至  
陝西道監察御史擢兵科給事中陞鴻臚少卿同南  
書房翰林行走官至光祿寺卿孝泳侍直

內廷凡奏御筆札用篆隸八分

內廷儲藏法書名畫鐘鼎法物

詔下詞臣審覆者皆得孝泳一言爲定論者謂其考訂之精可與郭恕先黃長睿相伯仲舉孝廉後七試春官不第其謝同南書房翰林行走表云舉頭黃榜昔思成進士之難聯步丹墀今獲從翰林之後一時

稱其雅切

婁縣志

劉錫信元名錫侯直隸通州舉人其跋唐瀛洲景城主簿彭君權殯誌銘曰石一方文爲幽州潞縣尉王諫撰得之潞縣故城北故城在通州潞河東八里土人呼曰古城元默敦將州大水水退而古城北露出

此石予既得唐李丕墓誌因并購之誌云季弟長源  
迎神葬于古漁陽北采賁里之原考水經注潞縣故  
城爲東漢漁陽城郡治誌與酈注合詳見予潞縣故  
城考誌載彭君世系頗悉惟不詳其郡邑第云廣德  
中有季父仕于恆因省遇亂來遊幽薊則浼非潞人  
也又云太尉遂寧王司徒義陽公魯衛更榮秉旄此  
府君嘗儒服曳裾燕語東閣浼蓋盧龍使府賓佐又  
云無何張惟岳以恆趙叛有詔司徒討逆考唐書朱  
泚傳拜盧龍節度封懷寧郡王徙王遂寧進拜太尉  
又朱滔傳云泚入朝以滔權知留後李惟岳拒命滔

與成德張孝忠再破之束鹿進檢校司徒遂領節度  
誌所謂魯衛更榮秉旄此府者泚與滔也惟義陽公  
之封滔本傳失載此誌固可補史之缺矣又考唐書  
紀傳均作李惟岳此誌稱張者以惟岳父寶臣元名  
張忠志賜姓李氏也當日或因惟岳拒命削除國姓  
仍稱張氏未可知也後泚滔皆不終臣節滔之逆命  
在建中三年四月涇原之亂在四年十月彭君卒于  
建中二年十一月固無可訾議耳至若東漢漁陽郡  
治潞後漢書地理諸家俱無可考僅見于水經注然  
此誌未出土以前讀酈注亦不知所指何地也王諫

金石學錄補

卷之四

四

生唐中葉後圖經諸書必猶有存者爰正其名爲古  
漁陽城令千載下因端竟委古蹟賴以不湮其文有  
本原如此

通州志

徐松字星伯大興人嘉慶中官翰林院編修著西域  
水道記于漢唐以來碑刻皆錄全文並記尺寸于燉  
煌縣搜得漢沙南侯碑唐索勳碑李氏修功德二碑  
皆著錄家所未見者

趙希璜長寧人官河南安陽縣知縣與武虛谷億同  
撰安陽金石錄

袁三綱袁五常安陽人嘉慶中于清涼山修定寺尋

得唐宋金元石刻十種趙希璜刊入安陽金石錄補遺

李宗瀚字公博一字春湖江西臨川人乾隆五十八年進士官至工部左侍郎宗瀚無他嗜好癖嗜金石文字所藏多名搨築湖東樓貯之桂林山水奇秀巖壁間多唐宋人手蹟登椒窮遠摩挲嗟玩手自拓殆遍又嘗得元康里氏所藏唐搨廟堂碑及唐搨化度寺碑皆親自鈎摹上石均極神妙

南村草堂集李公行狀

張端木字崑喬上海人乾隆壬戌進士官諸暨縣知

縣箸錢錄十二卷



方嵩年著錢譜十卷

萬光煒字子昭無錫人著古金錄四卷

陳萊孝字誰園著歷代鐘官圖經卷一古刀布卷二至卷七歷代正品附僞品而以外國錢終焉

宋振譽字葯川著續泉志八卷計五百八十餘圖以補洪氏之書子慶凝字愚村撰續泉志補

金忠清字古述休甯人又號硯雲德瑛子也著古錢錄四卷

孟超然字朝舉又字瓶庵福建閩縣人乾隆庚辰進士官至吏部考功司郎中著有瓶庵居士文鈔第四

卷皆碑跋頗足資攷證

吳穎芳字西林號臨江鄉人仁和人一赴童子試爲役隸所呵白是不復應博覽羣籍務爲專一之學嘗怪鄭氏夾漈之著書務與先儒爲難于是取二十略中之六書七音樂略一一尊先儒而探其源成吹豳錄五十卷說文理董四十卷音韻詩論四卷文字源流六卷金石文釋六卷

春融堂集

王念孫字懷祖江蘇高郵人乾隆四十年進士博通聲音訓詁之學尤精于校讎一字之徵博及萬卷所著讀書雜誌八十卷末爲漢隸拾遺凡宋以後諸家

金石錄卷之四  
所已及者略之有其字而未之及與誤指爲他字者  
補之凡二十五事旁徵博引精確不磨

馮敏昌字魚山廣東欽州人乾隆戊戌進士由庶吉  
士改官戶部主事撰孟縣志十卷內金石三卷殘碑  
斷碣靡不冥搜細考論者以爲有歐趙二錄之遺意

焉

孟縣志序

趙曾號北嵐山東萊陽人乾隆己酉舉人嗜金石所  
得漢人碑版拓本甚富自署爲百漢碑齋在嘉定時  
與錢竹汀宮詹及其從孫獻之州佐交遊甚密州佐  
故多吉金貞石之儲及病一以歸曾故于金石收藏

爲最富其在荆溪也公務雜沓中登祝陵訪吳孫皓封禪碑手搨其文又修石亭覆之以庇風雨勒銘善

權寺壁

陳文述臨道堂文鈔

郭尙先字元間又字蘭石福建莆田縣人嘉慶己巳進士官至大理寺卿長于書法鑒別精審鑑賞家非得尙先書不爲貴著芳堅館題跋

杜春生字禾子山陰人嘉慶丁卯舉人漢建初買地券爲浙江最古之石久埋苔蘚中僅見大吉二字與錢字土人遂傳爲錢武肅王微時販鹽遇官兵逃避石室中所題明人漫不加考據以入郡志春生始搜

得之嘗集紹興府屬八邑古刻爲越中金石記吳榮

光爲之序

石雲山人集

陳文述字雲伯杭州人著頤道堂文鈔晉孫夫人碑跋唐溫佶神道碑跋考證詳明有神史學所著西嶽華山碑考于長垣王文蓀四明豐熙關中王山史三本皆嘗寓目序述尤詳

趙紹祖號琴士安徽涇縣人廩貢生署滁州訓導道

光元年保舉孝廉方正著有金石跋四卷金石文鈔

十卷

安徽通志

林喬蔭侯官人乾隆舉人著福州石塔碑刻記

福建通志

鄭燕侯官貢生著唐陳觀察墓誌考據碑辨證薛史  
及八閩通志之譌

福建通志

李鴻瑞侯官人嘉慶戊午舉人官高淳知縣著校官  
碑考一卷

上

段嘉謨號襄亭偃師人嘉道間宰武功斬武功所有  
碑碣及家藏銅器爲金石一隅錄首載嘉慶二十四  
年邑人掘土所得北周驃騎將軍鞏賓墓志又于學  
宮廢碑中收獲李北海書任令則碑以長安市上收  
得唐吳達墓誌置之縣署皆自來金石書所未載者

金石一隅錄

徐宗幹字樹人通州人道光中知濟寧州與汪孟慈  
喜孫許印林瀚楊石卿鐸撰濟州金石志八卷凡金  
鄉魚台嘉祥三縣所有金石椎搨殆遍官至福建巡  
撫

車持謙字子尊上元諸生長于史學著金石叢話

同上江甯  
縣志

陸耀遹字邵文武進人官淮安府學教授酷嗜金石  
文字隨所至披輯摹拓小暇矻矻伏案考記所得過  
王侍郎金石粹編者幾半卓然可傳于世

養一齋集  
陸邵文傳

沈濤字匏廬嘉興人道光中官直隸正定府知府訪

搜古碑二卷共十餘條其中爲前人所未見者十之五六鈎摘參稽成常山貞石志二十四卷

朱士端字銓甫江蘇寶應縣舉人官廣德州訓導著有彊識編說文疏證宜祿堂金石記

許瀚字印林山東日照人精于考古尤嗜金石道光丙午得漢畫像于山東沂州府一石畫一人對次一人仰面形阮文達審爲伏生傳尙書圖一石畫一鳳形八分書鳳皇二字一石畫一鳳形八分書二行文曰三日乇日夙又一行曰東安王欽元又一小石刻一元字著有別雅訂四卷永建五年孝山堂食堂題



字釋文格伯敦考

理

王楠字任堂居吳江之盛澤好古而善聚自周秦彝器下至歷代石刻間世有精善者必羅而致之話雨樓故話雨樓金石之名頗著編有話雨樓碑目考證亦精

翟雲升字文泉山東人著隸篇四十五卷衡方碑陰向來未見著錄隸篇錄其文頗詳

馬邦玉山東魚台人嘉慶二十一年獲楊叔恭殘碑四石移置家塾其跋足資攷證

陳宗彝原名秋濤字雪峯江甯諸生嗜金石古籍所

手拓及校刊之書甚多著有重編金石文跋重編訪碑錄鐘鼎古器錄古磚文錄漢石經殘字攷蜀石經殘字攷

同治上江  
甬縣志

張寶德字容園舉孝廉方正著有鐵硯齋雙鉤石刻文字以司徒劉愷碑爲最工

同上

朱緒曾字述之上元人弱冠舉於鄉以浙江知縣用海升知府著作甚富於爾雅用功尤深著有續文鑑中論注論語義證金陵舊聞金陵詩匯等書金石文字記一卷于曹真碑天發神識碑考證尤精

同上

甘熙字實庵江甯人類聚古今人題詠金石者爲金

石題詠彙編四十六卷

同上

陳暘上元人著鐘鼎考

同上

姚際恆安徽人著金石僞書攷

安徽通志

方城梧桐城人著金華金石文字記

同上

巴樹穀婺源人著蟬藻閣金石文字記

同上

楊芳荀懷遠舉人著金石考

同上

鮑桂孫徽州人著石鼓文考

同上

沈巍皆字舜卿安徽六安州人進士官御史集金石

二千餘通續王氏之書名曰續金石粹編

同上

胡匡憲字懋中績溪廩生博通諸經工詩文著石經

詳考四卷

同上

劉寶楠字楚卿寶應人究心漢學官元氏縣搜獲古碑甚多以錢唐梁氏玉繩志銘廣例吳江郭氏鑿金石例補舉例甚略嘉興馮氏登府金石綜例雖較梁郭差備而疏略亦多乃本朱氏彝尊之意以東京爲主傳以經術加之博證爲漢石例六卷

漢石例序

李宗昉字芝齡官至左都御史江蘇山陽人著金石存十五卷

柏峴山房集

藏有周棘生敦商執戈鼎漢光和

斛

程學金字式如婺源人官戶部主事著金石紀聞

安徽

通志

牟農字星房棲霞人跋鄭固碑云山左金石志謂瑤琦當是鄭君二子之名蓋其弟從兄子之請而爲此銘也則是以延字爲請銘之辭文義牽強且漢人從無其子請銘之例琦瑤當是三人列名皆郎中之弟又跋鄭季宣碑云按此碑及鄭固碑皆不著其實蓋當時之族望也二碑並在州學所出之地雖不可考要其相去不遠皆任城人也以二碑證季宣當是郎中鄭固之弟于序爲季名延字季宣也郎中碑云琦瑤延當是三人列名郎中兄弟四人長名固字伯堅

仲名琦叔名瑤延字季宣小尔正延散也左傳卽宣其氣杜注宣散也名延字季宣義亦協固生元初之初季生于永建四年固卒宣已三十餘矣固之銘辭蓋卽季宣所作固碑云著君之子此云聘君之孫按後漢書鄭均傳云東平任城人建初六年公車特徵再遷尙書拜議郎告歸疑聘君卽指均也漢人最重公車特徵徵卽厯官不顯仍謂之聘君均之子名英東觀記云均遣子英奉章詣闕其卽爲箸令者歟馬星垣字鐵橋魚台人道光十九年訪得永建五年刻石于雨城王鳳林家移至魯橋藏于家著有漢碑

金石錄  
錄文考證甚詳

王某字中峰著有濟南金石志

翁大年字叔均廣平子也承其家學篤嗜金石攷據  
工篆刻交游遍大江南北不輕干謁其所撰金石文  
字甚具古官印志八卷古兵符考八卷泥封考二卷  
陶齋金石考二卷陶齋印譜二卷瞿氏印考辨證一  
卷秦漢印型二卷舊館壇碑攷二卷其所校舊館壇  
碑攷尤爲精力所注論定宋元明今五十餘家之訛  
瞿中溶序之以爲可補歐陽集古錄之缺訂亭林金  
石記之譌云

汪士祝江蘇無錫人進士嘉慶十四年知四川雙流縣事修雙流縣志金石門載梁新德三年福田寺碑全文孟蜀內侍殘碑爲諸書所未見

王椿源字介屏山西靈石縣人道光己酉宰渠縣馮煥神道沈君神道皆建亭覆之以蔽風雨著有嵐溪詩鈔死木果木之難贈太僕卿

同治渠縣志

萬承紀字廉山江西南昌人副貢生嘉慶初由軍功起家知縣官至海防同知署淮揚道篆法似李陽冰畫入北宋之室癖好金石嘗以所藏漢魏碑縮臨刻于端石硯之背凡百種名百漢碑硯鉤摹極精過于



褚千峯金石經眼錄

頤道堂集

陳受笙字敬安海甯人嘉慶庚午舉人精于鑒古及金石之學書畫俱入能品客遊粵東最久卒年五十手拓漢唐古鏡銘識及全形辨釋之爲鏡史二卷關中金石志二卷又有客秦隨筆六卷古今奇姓名錄四卷松籟閣詩鈔十八卷

海昌備志

錢馥字廣伯號綠窗又號慢齋布衣著有集古鐘鼎

千文一卷

全上

徐鼎字恭三號庚笙海甯州廩生策鈔前人題詠金石之詩爲吉金貞石詩鈔

全上

楊栩字書巖山東益都人與桂未谷郝蘭皋交善以

樸學著稱著有徙建北齊臨淮王碑記

書巖  
續稿

李載春字和軒江西鄱陽人嘉慶中知山東濟南府

重建北齊臨淮王碑于文昌祠下

全上

程文榮字蘭川號南邨嘉興楓涇人入貲爲江蘇候補理問好金石藏有舊館壇碑著帖攷

貝塘蘇州人聚金石千餘通葺千墨庵儲之彭甘亭

有詩

翁樹培字宜泉大興人方綱子嘉慶癸未進士官至刑部員外專愛古錢積數十年不倦箸古錢彙攷八

卷

董桂科字蔚雲婺源人道光癸未進士著石經攷一卷

馮鵬字晏海南通州人酷嗜金石文字見收藏家銅器有款識者輒繪錄之取三代至元鐘鼎戈戟度量鏡盤匱印泉刀之類爲金索六卷碣碑磚瓦之類爲石索六卷皆圖其形而摹其文鉤勒頗精

葉紉之好金石計前後所獲出于王少司寇粹編之外不少取六朝至五季誌銘造像題名等裝演成冊手定目次共一百五十餘種而凡豐碑大字皆不與

焉思適齋集

李彥樂字蘭卿福建侯官人翁方綱門人官至廣西按察使收藏漢魏以來石刻拓本二千餘通著有榕園文鈔中多碑跋考廖州智誠洞碑最詳

周世熊字清泉餘姚人官光祿寺署正所居客星山多出古磚皆收藏嵌壁間咸豐壬子訪得漢三老碑爲海內東京石刻之冠築亭庋之并攷碑稱掾諱忽字子儀省爲董子儀自爲跋記得碑緣起甚詳

包世臣字慎伯涇縣人所著藝舟雙楫表章北碑甚力

洪頤煊字筠軒台州臨海人孫星衍門人嘉慶十六年館于星衍糧道署中取平津館所藏碑讀之前人題跋有所未盡者輒跋于左咸平津館讀碑記後又益自得各碑成績記一卷再續一卷三續二卷嚴觀字子進江甯人著江甯金石記

吳榮光字伯榮號荷屋廣東南海人官至湖南巡撫藏辛舉卣祖乙鼎姬彝蟬笠尊太史虐父己彝兵史鼎碑版二千餘通著筠清館金石記

石雲山人集

熊象階潛山人官濬縣知縣著濬縣金石錄

夏之盛字松如藏商祖癸卣周矩尊周雷甗周臣簋

彝周大蒐鼎

徐櫛字問渠錢唐人藏商父癸爵周應公鼎

李璋煜字方赤山東諸城人進士道光中累官揚州知府  
薦升布政使藏商父癸爵兕形父乙舉漢大梁鼎

瞿世瑛肅山人藏商咸解周姬豆小子愉敦蘇公敦周罔鼎  
黃安濤字霽青嘉善人工詩文歷官江西廣信廣東  
潮州府知府著有開益齋息耕草堂詩文集藏彙作  
敦收入筠清館金石記

姚晏字聖常歸安人文僖公文田子歷官  
藏周兼史尊著中州金石目四卷筠清館金石記  
部郎中

韓克約字芸舫介休人官至巡撫藏周於鼎於彝同上  
沈欽韓字文起號小宛蘇州木瀆鎮人嘉慶十二年  
舉人官甯國縣教諭著兩漢書疏證七十四卷左傳  
補注十二卷考異十卷三國注補訓故八卷辨地理  
八卷水經注疏證四十卷昌黎集補注四十卷幼學  
堂詩集十七卷文集八卷文集之末附駁金石粹編  
二十餘條皆極精核

陳慶鏞字乾翔別署頌南福建晉江人道光壬辰進  
士由庶吉士改戶部主事歷官工科給事中道光中  
疏請申明刑賞指斥貴近得

旨嘉納有抗直敢言之褒時與臨桂朱琦高要縣魁有三御史之目生平摯精漢學而服膺宋儒嘗懸一聯曰六經宗許鄭百行學程朱著有齊侯壺通釋二卷籀經堂類稿二十四卷集中有鐘鼎考釋二十二篇攷訂甚精

丁晏字儉卿山陽人著有北宋汴學篆隸二體石經記一卷

黃本驥字虎癡湖南長沙人著古誌石華隋唐石刻拾遺金石粹編補目

吳蘭修字石華廣東嘉應州人著南漢金石記



夏寶高郵人著山右金石錄

魏本唐字又瓶福建侯官人官上杭教諭道光中陳壽祺總纂福建通志本唐分修金石一門訂正甚多謝道存著漢魏石刻記存

吳式芬字子苾號誦孫山東海豐人道光甲午進士官至內閣學士酷好金石文字就寰宇訪碑錄補其未備刪其訛複增入三代秦漢以來吉金各注某氏家藏如孫錄收甄氏之例惟不載璽印泉幣鏡銘只載有年月者孫錄未詳碑額亦並補之書約十六卷名曰攬古錄又復薈萃金石目錄分州縣編之其存

者則列爲己見未見者則注明見某書列爲待訪凡  
古今金石諸書無不備採復取歷代史籍及諸家文  
集說部以益之墓誌以曾出土著錄者爲斷而不采  
文集鐘鼎甌瓦流傳本無定所亦不收載地里未詳  
者別附於後以俟參攷名金石彙目分編約四十卷  
於欵識古文研究六書多所攷釋於穹碑巨碣缺文  
誤字博訪舊本多所補正皆散見所蓄金文冊子及  
手校金石各書近時關中漢泥封出土綦多謂足明  
兩京制度訂史冊沿譌哀集搨本據漢志編次加以  
攷證成一卷

述行

劉師陸字青園又字子敬山西洪洞人嘉慶庚辰進士官至霸昌道著虞夏贖金釋文一卷謂安邑當緩等布爲上古贖罪之金

蔡雲字鐵耕元和人著癖談一卷論刀幣圖法頗能獨抒己見

張崇懿字麗瀛雲間人管錢志新編二十卷

馬昂字昂伯華亭人著貨布文字考四卷

初尙齡萊陽人字渭園著古今所見錄十五卷

戴熙字醴士箸古泉叢話四卷

金錫鬯字蔣穀仁和人著晴韻館古泉述記

李佐賢字竹朋山東利津人官至汀州府知府所藏刀布至二千餘品藏拓本五千餘品著古錢匯六十四卷分元亨利貞四集元△爲古布亨△爲古刀利△爲圖法正品貞△爲雜泉異品

鮑庸字子年歙縣人官至夔州府知府著觀古閣泉說

毛式玉字伊人山東掖縣人乾隆十九年進士官翰林院檢討嗜金石刻以翰林歸田日嘗騎驢裹糧入天柱山徧拓元魏高齊碑道旁觀者不知其爲貴人

也

潛筆堂集  
毛君墓誌

陳樹華字芳林江蘇元和人著春秋內外傳攷證其  
字畫悉依唐石經

錢泰吉字警石海鹽人博學好古精于斟酌著甘泉  
鄉人稿碑跋二卷頗足以資攷證

劉永松字筠川福建侯官人輯烏石山志詳於石刻  
韓崇字履卿元和人著江左石刻文編寶鐵齋金石  
跋尾

顧沅字湘舟長洲人藏書畫碑帖甚富宋拓夏承碑  
尤爲世間希有之本著吳中金石志

沈復燦字霞西山陰人隱于書肆究心古學山陰杜

木子韜越中金石記霞西實左右之而遺文古蹟爲

前記所略者裒積自成一編曰越中金石廣記

躬恥齋集

曹載奎號秋舫居蘇州盤門汲水橋性嗜古鑒別頗精  
瓷銅玉石無所不好而于金尤甚以所藏鐘鼎尊  
彝敦匱之屬五十九事刻之于石名曰懷米山房金  
石圖圖其形象摹其款識注明尺寸鉤勒頗精

方可中江陰碑工勤于訪古趙之謙撰續寰宇訪碑  
錄可中爲之搜訪居多

劉位坦字寬夫大興人深于金石之學子銓福字子  
重亦世其學

莫友芝字子偲自號邵亭晚號瞿叟貴州獨山州人  
道光辛卯舉人於蒼雅訓詁六經名物制度靡所不  
探討旁及金石目錄家之說尤究極其奧竅所爲詩  
雜文皆出于人又工眞行篆隸書求者肩相摩于門  
墓誌所著金石筆識附刻宋元舊本書經眼錄之後其  
蕭澹碑釋文多出金石粹編一千二百二十字尤爲  
精確

呂佺孫字堯仙常州武進人道光丙申進士官至福  
建巡撫酷嗜金石收藏三代以來錢布略備秦漢銅  
印千餘方古鏡百餘著有運甓軒錢譜四十卷金石

存考二卷嘗以所得古磚揭其文字及其旁側所給  
藻飾爲按代以釋其時著其長短尺度詳其所得之  
地並委曲盡其字文所不可通者積成三四巨冊名  
曰古磚錄李兆洛爲之跋

程慶餘字心齋烏程人究心六書金石之學而文筆  
艱滯坐是久困童子試不得售嘗欲爲續金石粹編  
未成同治元年死于難

方朔字小東安徽懷甯人著枕經堂金石題跋

馮承輝字少眉松江人以所藏三代至宋盤敦鼎鑑  
戈鏡刀布磚瓦之屬有文字可資考證者摹圖上版



爲金石荊一卷

沈樹鏞字韵初南匯人咸豐己未舉人家饒于貴幼卽好名人書畫不惜重值嘗得董北苑真迹懸其室曰寶董樓兵燹之後家中落專意碑刻所藏劉熊碑漢石經皆世間希有之本近年以來大江南北收藏碑帖之富無以比焉

何慶恩字凱堂廣西人同治三年以四川彰明縣署梁縣事重修縣志于金石一門考證頗詳志稱馮煥墓在梁縣北六十里土溪場側之趙家坪尙存三石闕每闕隔里許高丈餘廣約四尺厚二尺有奇上刻

朱雀下刻龜蛇旁刻人物花草兩闕字跡摩滅其一  
文云故尚書侍郎河南南京令豫州幽州刺史馮君神  
道又載沈君神道二闕在梁縣北八十里之巖峯場  
側舊名燕家場

丁彥臣字筱農浙江歸安人歷署山東督糧道性喜  
金石篆隸藏有伯卿鼎兮仲敦伯癸彝祖辛鼎匜尊  
旅伯剛卣井季卣伯魚卣井戾盃伯攻盃魯伯慝鬲  
周宮壺卽墨刀範諸器

吳雲署平齋晚號退樓歸安人歷署蘇州府知府篤  
學攷古至老不疲攷訂金石文字稿有依據一字之

疑窮日夜討索不置儀徵阮氏嘉興張氏蘇州曹氏  
藏吉金爲東南最亂後散失往往于市肆中物色得  
之不惜解衣質買人以比之王元美云著有兩壘軒  
彝器圖釋十二卷古銅印存十二卷古官印考六卷  
攷印漫存九卷焦山志十六卷號季子盤攷漢建安  
弩機攷虞溫公碑攷華山碑攷各一卷

行述

許宗寅字吾田安徽舉人著書頗富于地理水道稽  
核尤精道光乙巳尋得遼重熙五年碑檢校司空撰  
文金大定二年碑河中張瓚撰文碑陰載金大定二

年勅

籀經  
堂集

曹籀字葛民仁和諸生與趙之謙同治金石之學

趙之謙字樞叔會稽人咸豐己未舉人官江西鄱陽知縣工書畫尤長篆隸著有補寰宇訪碑錄

溫忠善字元長山西太谷人官刑部主事酷嗜金石藏碑之富與江蘇沈韵初埒

樊彬字文卿大興人好藏碑刻陳立行墓誌據甲子四周歲在丁丑二語攷爲大中十一年

王國均字侶樵直隸滄州諸生著滄州金石志藏有

東魏龍驤將軍王僧墓誌

補寰宇訪碑錄

趙良霸涇縣人著涇川金石記

陳介祺字壽卿號篋齋山東濰縣人官至翰林院編修收藏金石之富甲于海內彝器至數百件尤著者爲毛公鼎文七百餘字爲天下金器之冠三代沙器數百件周卣數十方漢卣萬餘秦詔版十餘魏晉六朝造像數百自來收藏家所未有也

魏錫曾字稼孫仁和人諸生納貲爲福建浦南場鹽課大使雖處微僚狷介自守惟以金石自娛藏碑極富粹編所未收者計二千餘通著績敵堂碑錄攷訂頗精

陸增祥字莘農太倉州人官翰林院修撰著有八瓊

室金石補正藏魏晉磚三百餘

汪鋈字硯山儀徵人工詩善畫尤邃于金石箸十二硯齋金石過眼錄十二卷足補粹編之遺

宋祖駿長洲人同治庚午權知東平州得漢無鹽太守殘石于州之蘆泉山陽土阜中移立學宮明倫堂湯璫字子厚無錫人博覽強記精研金石之學常佐沈匏廬濤纂常山貞石志

無事爲福齋筆記

韓泰華字小亭仁和人道光中官四川潼川府知府搜得武成三年經幢移置琴泉寺著有無事爲福齋筆記攷證金石者居多

邊浴禮字袖石任邱人常佐沈苑廬撰常山貞石志

段錫由字筠坡南樂人常佐沈苑廬撰常山貞石志

常山貞石志序

張穆字石洲號月齋山西平定州人優貢生通經史

精篆籀道光己酉卒年四十五著有魏延昌地形志

蒙古遊牧記月齋詩文集文集有金石跋十三首考

證甚精月齋集

程洪溥字木庵安徽歙縣人藏三代以來銅器甚富

竟甯雁足鐙其尤著者月齋集

僧達受字六舟海甯人既工于摹拓又善刷剔古銅

器欵識嘗游黃山爲程木庵別竟甯雁足鐙白鳳樊  
榭翁覃溪以來所疑爲殘蝕漫漶者一旦軒帑紙上  
纖毫畢見因作剔鐙圖徵海內詩人歌詠之

力齋集

徐燮鈞常州陽湖人官陝西鳳翔知縣得號季子盤  
于民間重今權四百七十餘斤自古重器無若斯之

巨者

同上

俞燮字理初歙縣人著癸巳類藁據魏書李彪傳禮  
田岐陽句定石鼓爲魏太武時物

倪模字迂存號韭瓶安徽望江人嘉慶己未進士留  
心金石之學尤嗜古泉著古今泉略三十二卷



王家齊浙江金華人官廣東鹽場大使集金華縣屬金石八十六種爲金華金石志二卷

方履錢字彥聞嘉慶二十二年舉人署福建閩縣知縣有政聲年四十二卒于官讀書能貫其源流尤酷嗜金石文字所積幾萬種多金石萃編寰宇訪碑錄所未載編爲富衡齋碑目六卷箸河內縣志二十卷武陟縣志二十卷游伊闕時居山中匝月編搜石刻得唐以前造像題名多至八百餘種箸伊闕仿碑錄

三卷

光緒順天府志

楊翰字伯飛號息柯順天宛平人道光二十二年進

士官至辰沅永道工書善畫酷好金石文字官永州時浯溪石刻搜剔無遺如元結石堂銘盧均題名皆前人所未見同治壬申罷官游粵西得大厯平蠻頌諸碑箸粵西得碑記一卷

同上

李光庭順天人箸吉金志畧四卷前一卷專錄錢幣後二卷錄及鼎彝鐘鐸之類

同上

馬恕道光丁亥官洛陽縣知縣集縣中石刻自魏至宋六十八種建存古閣儲之吏暇次第搜訪自晉至宋得碑一千三百餘種

吳汝綸道光中知冀州訪得北齊天統四年楊奴造

象記唐馬君起暨妻劉氏造石浮圖頌

鄧嘉緝撰上谷訪古記于易州石刻搜訪甚詳

直隸新通志

陳詩字愚谷湖北蘄州人乾隆戊戌進士授工部主

事告養歸不出道光丙戌卒箸湖北金石存佚攷二

十二卷四書類攷三十卷人名攷二十卷六律正五

音攷四卷竹書記年集註二卷

黃州府志

田溥光字季華原名普賈江都人監生通小學工詩

金石碑版考訂無僞箸有揚州金石志金石話目耕

齋筆記漢學堂詩文集

光緒揚州續志

毛瀚揚州人箸有荊花書屋金石錄

甘揚聲字敬符江西崇仁人著有金石碎跋十二卷  
漢隸異同十二卷

王朝桀字達淦江西萬年人著有唐石經考正